

*Kico awo si famia no ta acepta nan*

## FMAA: Clientenan preocupa como no tin caminda pa nan bay

**ORANJESTAD** - Fundacion Maneho di Adiccion Aruba (FMAA) ta sinti e efecto directo na momento cu mester a baha gasto. Algun departamento por opera den un forma minimo cu e poco personal, pero otro mester cera nan porta manera Cas Cristina na Balashi.

E director ta bisa cu esaki ta sosode entrante prome di september si no bin ningun cambio.

Durante e siman aki Bon Dia Aruba a publica riba e situacion na FMAA unda cu a menciona e ceramento di algun di e casnan cu ta ofrece guia y huesped. Cas Cristina na Balashi tambe ta un di e casnan di huesped pa damanan cu problema di adiccion cu lo wordo clausura pa motibo cu no tin mas placa.

Tanto e directora, Sirma Ras (riba potret), como algun di e empleadonan ya nan sa cu nan mester bay cas. Sra. Ras a splica cu e ta na e cas na Balashi desde dia 28 di october, 2013 y tin capacidad pa 10 hende, di cual nan tin 8. Tin 3 tratamiento diario cu ta bin na e cas y tin 7 trahado, di cual tres a wordo manda cas caba.

### Bek riba caya

Si e luga mester wordo cera entrante 1 di september, e damanan ta bay riba caya bek. Segun sra. Ras, tin varios di e clientenan cu tabata keda cerca nan cu no tin caminda pa bay. Tin un di nan cu a yega di biba canto di lama. Tin di nan a caba nan scol y hasta a haya un trabou, aunke cu na prome instante tabata hopi dificil, mirando cu un ex adicto ta haya un stempel y no ta haya un trabou sin mas.



E damanan a wordo avisa di e situacion dialuna, y nan a muestra nan preocupacion. Esun di mas jong tabata asina tristo, pasobra e no sa unda pa bay. E damanan no kier tende cuenta di bay na Centro Colorado, mirando cu eynan nan ta haya hende homber y hende muhe hunto, di cual sra. Ras a splica cu no ta funciona. "Cosnan ta pasa cual no mester pasa".

Tur e damanan aki tin famia, pero debi na malesa of adiccion, famianan ta benta nan un banda y p'esey Cas Cristina ta haci cu actividadnan di terapia pa e famia bin hunto bek cu e cliente. No ta algo cu ta sosode di un dia pa otro, e ta tuma su tempo. Tin famia cu no kier tuma e damanan mes na cas. Tin di nan ta acepta nan, pero no mag keda cas. E confiansa mester wordo reconstrui, segun sra. Ras. "Hopi biaha den nan adiccion, e cliente ta plunder tur cos na cas, esey ta wordo menciona. E confiansa ta tarda pa bin. Esey ta haci cu famianan ta pusha e person-

anan aki un banda", sra. Ras a comenta cu e ta comprende e famia nan decision.

### Trahado a kea sordo

Julissa Arends tambe ta trahado na Cas Cristina, pero ta trahando cu e fundacion desde 2005, trahando na Centro di Motivacion. Pero su trabou no a bay facil. Arends a cambia di centro pa motibo cu un di e clientenan di e centro di motivacion, a dal e

na su horea, haciendo e sordo te cu dia di awe.

### Problema falta di trahado

Sra. Arends a relata cu hopi biaha e problema ta bin pa motibo di falta di trahado. El a splica cu dia cu e accidente a pasa, e tabata su so riba warda cu 25 cliente. El a sigui splica cu e no por a haci nada, sino tuma e sla, cu e consecuencianan cu tin awor aki.

Sra. Arends actualmente ta

trahando na Cas Cristina na Balashi y ta sinti su mes mas trankil. Aunke, e no sa kico lo bay pasa ora cu e centro cera. El a enfatisa cu e no lo kier bay bek centro di motivacion. E no kier hinca su bida den peliger un biaha mas. El a sigui bisa cu e ta dispuesto pa coopera 100% cu e trabounan, pero e no lo haci esey su so.

### Un adicto ta un enfermo

Un adicto ta un enfermo, Esey ta palabranan di Marjorie Vermeer, kende tambe ta forma parti di e fundacion. E ta sigui bisa cu mester comprende cu un adicto, no ta kies pa ta un adicto. Ta algo a pasa den su bida cu el a bay den e caminda ey.

Un pais moderno manera Aruba, mester por brinda un servicio medico na nos enfermonan. E peticion ta pa pone tur e curasonnan di Aruba hunto, tambe di gobierno pa wak kico por haci pa e enfermonan. "Porta por haya donacion di pueblo. Ken sa, lo ta un soño si por tene FMAA habri y sigui duna e enfermonan eyfo yudansa". sra. Vermeer a conclui. □